

**ՀԻՄՆԱԴՐԱՄՆԵՐԻ ԵՎ ԱՆՀԱՅ ԲԱՐԵՐԱՐՆԵՐԻ ՆԵՐԴՐՈՒՄԸ ԱՐՑԱԽԻ ՀԱՆՐԱՊԵՏՈՒԹՅԱՆ  
ԱՌՈՂՋԱՊԱՀԱԿԱՆ ԾՐԱԳՐԵՐԻ ԻՐԱԿԱՆԱՑՄԱՆ ԳՈՐԾՈՒՄ**

Արարատ Վարդանյան  
պ.գ.թ., դոցենտ, ԱրՊՀ, ՍՍՀ  
Արցախ  
Բելլա Բաբայան  
ԱՀ նախագահի աշխատակազմ  
Արցախ

**Անոտացիս:** Արցախի Հանրապետության առողջապահական ոլորտի ինդիքների լուծման գործում անգնահատելի է հիմնադրամների, սփյուռքահայ անհատ բարերարների օգնությունը: Նրանց հովանավորությամբ և Արցախի Հանրապետության կառավարության համաֆինանսավորմամբ կյանքի են կոչվել տասնյակ բուժկետներ, հիվանդանոցներ, դեղորայք, ժամանակակից բուժսարքավորումներ, իրականացվել բուժանձնակազմի վերապատրաստում: Շնորհիվ ազգանվեր այդ օգնության լուրջ հաջողություններ են ձեռք բերվել առողջապահության ոլորտում:

**Բանալի բառեր՝** Արցախի Հանրապետություն, «Հայաստան» համահայկական հիմնադրամ, Միացյալ հայկական ֆոնդ, «Հայաստան-Արցախ» հիմնադրամ, «Զինիշյան հիշատակի հիմնադրամ», «Հովարդ Կարագյոլյան» հաստատություն, ներդրում, բարերարներ, բարեգործություն, առողջապահական ծրագրեր:

Հետխորհրդային առաջին տարիներին Հայաստանի և Լեռնային Ղարաբաղի տնտեսական ու սոցիալ-մշակութային կյանքը ծանր էր. երկրաշարժ, պատերազմ, շրջափակում, տնտեսական ու սոցիալական ճգնաժամ: Անկասկած, այս ամենը սպառնում էին անկախ Հայաստանի Հանրապետություն կերտելու հայության փայփայած երազանքին: Հենց այդ ժամանակ է՝ 1992-ի մարտ ամսին, ծնվեց «Հայաստան» համահայկական հիմնադրամը: Համազգային բարեսիրական այդ կազմակերպությունը համախմբում է համայն հայության ուժերն ու կարողությունները, օգնում հայրենիքի զարգացմանն ու բարգավաճմանը և կայուն հիմքեր ստեղծում ազգային պետականությունն ամրապնդելու համար: Հիմնադրամի ինդիքներն են՝ օժանդակել Հայաստանի և Լեռնային Ղարաբաղի տնտեսության զարգացմանն ու բարեփոխումների իրականացմանը, գիտության, կրթության, մշակույթի, առողջապահության համակարգերի բարելավմանն ու կատարելագործմանը, 1988թ. դեկտեմբերյան երկրաշարժի հետևանքների հաղթահարմանը, արցախահայության կարիքների, բռնագաղթվածների հիմնահարցերի և համազգային կարևորություն ունեցող այլ ծրագրերի իրագործմանը: [1, էջ 105], [2, էջ 4]

Հիմնադրամի դեկավար մարմինը հոգաբարձուների խորհուրդն է, որի կազմը հաստատվում է ՀՀ նախագահի հրամանագրով: Խորհուրդը գլխավորում է ՀՀ նախագահը: Խորհրդին անդամակցում են Հայաստանի Հանրապետության և Արցախի հանրապետության իշխանությունների, եկեղեցիների, սփյուռքահայ կուսակցությունների, բարեգործական կազմակերպությունների ներկայացուցիչներ, ճանաչված անհատներ: Հոգաբարձուների խորհուրդը ստեղծում է հիմնադրամի գործադիր վարչություն, որը կազմակերպում է հիմնադրամի ընթացիկ գործունեությունը:

Հիմնադրամն իր ստեղծման օրից հետամուտ է համախմբելու աշխարհասփյուռ հայությանը՝ ի նպաստ Մայր Հայաստանի և Արցախի բարգավաճման: Այստեղից է՝ հիմնադրամը գերինդիր ունի համահայկական ներուժի համախմբում և Հայաստան-Արցախ-Սփյուռք կուտ եռամիասնության շնորհիվ կյանքի կոչել ազգային վեհ գաղափարներ ու լուծել համազգային նշանակության խնդիրներ:

«Հայաստան» համահայկական հիմնադրամն իր ծրագրերն իրականացնում է 25 տեղական մարմինների միջոցով, որոնք գործում աշխարհի 22 երկրներում: [2] Նրա միջոցները գոյանում են տարեկան հեռուստամարաթոնի, հեռախոսամարաթոնի, ճաշկերությների հանգանակություններից, բարեգործական համերգների հասույթներից, փոստային, SMS նվիրատվություններից և կազմակերպությունների ու անհատների նպատակային հատկացումներից:

Հիմնադրամն Արցախում սկսել է գործել դեռ պատերազմի տարիներից և իրականացրել է բազում ծրագրեր հանրապետության գրեթե բոլոր շրջաններում: Հետպատերազմյան տարիներին նրա նախաձեռնությամբ և միջոցներով բացի լայնածավալ հումանիտար օգնությունից, Արցախում կյանքի են կոչվել ռազմավարական նշանակություն ունեցող բազմաթիվ ծրագրեր, կառուցվել և շահագործման են հանձնվել ճանապարհներ, ջրագծեր, զազատարներ, էլեկտրագծեր, շենքեր, բնակարաններ, դպրոցներ, մանկապարտեզներ, մշակույթի օջախներ և այլն:

Հիմնադրամի ծրագրերի ծանրակշիռ մասն իրագործվում է Արցախում: 2009թ. այստեղ բացվել է գրասենյակ, որն ակտիվորեն նպաստում է Արցախում իրագործվող ծրագրերի կենսագործմանը: Հիմնադրամի կողմից իրագործվող ծրագրերն իրականացվում են Արցախի կառավարության համաֆինանսավորմամբ: Փոխաշխման այդ սկզբունքը ողջունելի է տեղական մարմինների բարերարների համար: Այդ սկզբունքով 1992-2008 թվականներին Արցախում իրագործվել է 244 ծրագիր, որի համար ծախսվել է ավելի քան 52 մլն դրամ կամ հայկական 14 մլրդ դրամ: [2, էջ 6]

Մեծ է Հիմնադրամի ներդրումը Արցախի Հանրապետության առողջապահական ծրագրերի իրականացման գործում: Նրա ֆինանսավորմամբ իրականացվել է Մարտակերտի շրջանի Գառնաքար, Մաղավուզ, Դրմբոն, Վաղուհաս գյուղերի բուժկետերի վերանորոգման և Ղազարահող գյուղի բուժկետի կառուցման աշխատանքները:[4, թ. 4] Հիմնադրամի ԱՄՆ Արևելյան Ափի տեղական մարմնի ֆինանսավորմամբ կառուցվել են Ստեփանակերտի քաղաքային պոլիկլինիկան և ախտորոշման կենտրոնը, իսկ ԱՄՆ Արևմտյան շրջանի հայության միջոցներով հիմնադրամը նորոգել է Հաղորդթ քաղաքի կենտրոնական հիվանդանոցի շենքը, նվիրել շտապ օգնության ավտոմեքենաներ: [5, էջ 109] ԱՄՆ Արևմտյան շրջանի տեղական մարմինը բուժական սարքավորումներ է հատկացրել Մարտակերտի շրջանի Վանք գյուղի հիվանդանոցին: Ֆրանսիայի հանձնախմբի կողմից վերանորոգվել է Շուշի քաղաքի հիվանդանոցի կաթսայատունը և ջերմատար ցանցը: [2, էջ 10] Հիմնադրամի ֆինանսավորմամբ կատարվել է Շուշի քաղաքի «Զեռք ձեռք» հասարակական կազմակերպության ատամնաբուժարանի մասնակի վերանորոգման և կահավորման աշխատանքները:

Արցախի Մարտունու շրջանը շուրջ 25 հազար բնակիչ ունի: Մարտունի քաղաքում, շրջանի մեծ ու փոքր գյուղերում ապրող մարդիկ անցած տարիներին բուժօգնություն էին ստանում 1965-ին կառուցված երկհարկանի մի շենքում, որը հինգ տասնյակի ընթացքում գրեթե չէր նորոգվել: Հիմնադրամի ԱՄՆ Արևելյան շրջանի տեղական մարմնի և ԼՂՀ կառավարության համատեղ ֆինանսավորմամբ կառուցվեց նոր հիվանդանոց: Նորակառուց բուժհաստատությունն ունի պոլիկլինիկա, ախտորոշիչ կենտրոն, հակահամաձարակային, շտապ օգնության, վիրաբուժական, թերապևտիկ բաժանմունքներ և ծննդատուն: [6, էջ 32]

«Հայաստան» համահայկական հիմնադրամի Ֆրանսիայի տեղական մարմնի ատենապետ Պետրոս Թերզյանի աջակցությամբ, ֆրանսահայ բարերար Ռիշար Օհաննիսյանի հովանավորությամբ և Արցախի կառավարության համաֆինանսավորմամբ Ստեփանակերտում, Հանրապետական բժշկական կենտրոնի հարևանությամբ բացվեց ուսուցքարանական դիսպանսերի նոր շենք: Նորակառուց կենտրոնը կրում է Ռիշար Օհաննիսյանի ծնողների՝ Վարդան և Գոհարիկ Օհանյանների անունը:

Դիսպանսերը նախատեսված է 35 հիվանդի համար: Այստեղ իրականացվելու են՝ ուսուցքարանության մեջ ընդունված արդի բուժական և ախտորոշիչ բոլոր միջամտությունները՝ բացառությամբ ճառագայթային բուժումի: [7]

Միացյալ հայկական ֆոնդ (ԱՀՖ, անգլերեն՝ United Armenian Fund)բարեգործական կազմակերպությունը հիմնադրվել է 1989-ի նոյեմբերի 7-ին Լոս Անջելեսում՝ ամերիկահայ հասարակական գործիչ Հարութ Սասունյանի նախաձեռնությամբ և ԱՄՆ-ում գործող յոթ խոշոր հայկական կազմակերպությունների՝ Ամերիկայի հայկական համագումարի, Հայկական բարեգործական ընդհանուր միության, Հայ օգնության միության, Հայ առաքելական եկեղեցու ԱՄՆ-ի Էջմիածնական և անթիլիասական թեմերի առաջնորդարանների, Ամերիկայի Հայ ավետարանչական ընկերակցության և Քըրք Քըրքորյանի «Լինսի հիմնարկի» միացյալ ջանքերով: Նպատակն էր համակարգել և ավելի արդյունավետ դարձնել սփյուռքի օգնությունը 1988-ի ավերիչ երկրաշարժից տուժած Հայաստանին, հայրահարել շրջափակման արգելքները՝ օդանավային կանոնավոր առարումներ կազմակերպելու միջոցով: Ակզրում կազմակերպությունն առանձնակի կարևորություն է տվել դեղորայքի և բժշկական սարքերի մատակարարմանը: Սակայն ժամանակի ընթացքում,

Ելնելով Հայաստանի և Արցախի տնտեսական կացության թելադրանքից, ընդայնել է գործունեության ասպարեզը: [8, էջ133] ՄՀՖ-ը իրականացնում է մարդասիրական, առողջապահական, սոցիալական, շինարարական, գյուղատնտեսական, կրթական և այլ ծրագրեր:

Միացյալ հայկական ֆոնդն իր գործունեությունը դադարեցրեց 2015թ. նոյեմբերի 30-ին: Նրա գործունեությունը շարունակեց «Հայաստան-Արցախ» հիմնադրամը: Այն հիմնադրվել է 2015թ. դեկտեմբերի 1-ին ԱՄՆ Գլենդել քաղաքում (նախագահ՝ Հարութ Սասունյան): Հիմնադրամի առաքելությունն է շարունակել մարդասիրական այն հսկայական աշխատանքը, որ Միացյալ հայկական հիմնադրամը իրականացրել է վերջին 26 տարիների ընթացքում՝ 720 մլն դրամ արժողությամբ մարդասիրական օգնության տրամադրելով հայրենիքին: Նախատեսվում է ամեն տարի մարդասիրական օժանդակության տրամադրել Հայաստանի և Արցախի հիվանդանոցներին, պոլիկլինիկաներին, դպրոցներին, մանկատներին և տարբեր բարեգործական հաստատությունների՝ նրանց տրամադրելով կենսական անհրաժեշտության դեղորայք, պատվաստանյութեր, բժշկական սարքավորումներ, մանկական սնունդ, գյուղատնտեսական սարքավորումներ, համակարգիչներ, ձմեռային հագուստ, կոշիկներ, խաղալիքներ, գրքեր և բազմաթիվ այլ ապրանքներ: [9]

2015թ. դեկտեմբերի 1-ին հիմնադրվելուց ի վեր «Հայաստան Արցախ» հիմնադրամը 18.5 մլն դրամ արժողությամբ մարդասիրական օժանդակություն է տրամադրել Հայաստանի և Արցախի բնակչությանը: Հիմնադրամի առաքած նպաստը ներառել է հիմնականում անհրաժեշտ դեղորայք քաղցկեղնի, սրտի, աղիքների և մտային հիվանդությունների բուժման համար, ինչպես նաև դեղորայք ու բժշկական պարագաներ՝ ապրիլյան պատերազմում վիրավորվածների խնամքի համար:

Մինչ 2016թ. հունիսը Հիմնադրամի կողմից Արցախի առողջապահության ոլորտին նվիրաբերվել են 71 մլն դրամ արժողությամբ դեղորայք (այդ թվում «Կլոպիդոգրել» դեղը, որը մեծ նշանակություն ունի սիրտ-անոթային համակարգի հիվանդություններով տառապող անձանց համար), բժշկական սարքավորումներ, այլ պարագաներ (մոտ 6.5 տոննա), որոնք բաշխվել են նախարարության ենթակա բուժհաստատություններին: [10] Հաշվի առնելով, որ «Հայաստան-Արցախ» հիմնադրամն այն կազմակերպությունն է, որ հաջորդել է Միացյալ հայկական հիմնադրամին, 1989-ից ի վեր զույգ կազմակերպությունների կողմից հայրենիքին տրամադրված նպաստի ընդհանուր արժեքը կազմում է 738,5 միլիոն դրամ: «Հայաստան Արցախ» հիմնադրամին կանոնավոր կերպով առաջարկվում են միլիոնավոր դրամների արժողությամբ կյանք փրկող դեղորայք և բժշկական պարագաներ, - նշում է Հարութ Սասունյանը: - Երախտապարտ ենք մեր առատաձեռն բարերարներին, որոնց աջակցության շնորհիվ կշարունակենք անհետաձգելի նպաստ տրամադրել Հայաստանի և Արցախի բժշկական կենտրոններին: [11]

**1966** թվականի մայիսի 7-ին ԱՄՆ-ում Վարդան Զինիշյանը, ի հիշատակ ծնողների՝ Վերապատվելի տեր և տիկին Հարություն (Հայ Ավետարանական եկեղեցու հովիլ) և Կատրին Զինիշյանների, հիմնել է «Զինիշյան հիշատակի ծրագիր» (ԶՀԾ) կազմակերպությունը: Հիմնադրման թվականից սկսած՝ ԶՀԾ-ն իր ծառայություններն ուղղել է Լիբանանի, Սիրիայի, Իրանի, Իրաքի, Երուսաղեմի, Թուրքիայի և հակամարտությունների ու անկայությունների շրջաններում գտնվող այդ երկրների կարիքավոր հայերին: ԶՀԾ-ն օգնել է բնակարանի, սննդի, հագուստի և բժշկական խնամքի կարիքավոր հայերին: ԶՀԾ-ն օգնել է բնակարանի, սննդի, հագուստի և բժշկական խնամքի կարիք ունեցողներին: [12, էջ 20]

Կազմակերպությունն իր աշխատանքները Հայաստանում սկսել է 1993թ. սեպտեմբերից՝ 1999-ին պաշտոնապես գրանցվել որպես «Զինիշյան» հիշատակի հիմնադրամ ԶՀԾ (անգլերեն Jinishian Memorial Foundation), բարեգործական կազմակերպություն: ԶՀԾ-ի հիմնական ֆինանսավորման արյուրը ԱՄՆ-ի Երիցական եկեղեցու Զինիշյան հիշատակի ծրագիրն է: Հայաստանում ԶՀԾ-ն ունի խորհրդատվական մարմին, որի անդամներն են Հայ Առաքելական, Հայ Ավետարանական, Հայ Կաթողիկե եկեղեցիների ներկայացուցիչները: Հիմնադրամը Հայաստանում գործունեություն է ծավալում հիմնականում վեց ուղղություններով՝ համայնքների գարզացում, առողջապահություն, գործարարության գարզացում, օգնություն, հոգևոր վերելք և բնակարանաշինություն: [13, էջ 722]

«Զինիշյան» հիշատակի հիմնադրամի առողջապահության ծրագրի շրջանակում ընդգրկված է նաև Արցախը: Լեռնային Ղարաբաղի Հանրապետության առողջապահության նախարարության հետ համագործակցությամբ 2009թ. մայիս-նոյեմբեր ամիսներին իրականացվել է «Համայնքային բուժքույրերի ունակությունների բարձրացման և վերապատրաստման ծրագիր Ղարաբաղում» 1-ին փուլը: 2010թ. ապրիլին ԶՀԾ-ի և բարոնուի Քորսի անվան Ստեփանակերտի վերականգնողական կենտրոնի հետ համատեղ իրականացվել է «Օժանդակություն հաշմանդամներին Ղարաբաղում»

ծրագրի 4-րդ փուլը. օգնություն է տրամադրվել դարաբաղյան պատերազմի 100 հաշմանդամի և 35 քաղաքացու, իսկ նույն թվականի մայիս-դեկտեմբեր ընկած ժամանակահատվածում «Զինիշյան» հիշատակի հիմնադրամի և ՀՀ առողջապահության նախարարության նախաձեռնությամբ ԼՂՀ-ում իրականացվել է «Համայնքային բուժքույրերի ունակությունների բարձրացում և վերապատրաստում» ծրագրի 2-րդ փուլը, որին մասնակցել է 53 համայնքային բուժքույր:[14] Այս ծրագիրը շարունակվել է հաջորդ տարիներին՝ 2011-ին վերապատրաստվել է 55 համայնքային բուժքույր, իսկ 2012-ին՝ 99-ը: 2012թ. հունիսի վերջին ավարտվել է դեռևս 2011թ. սկսված «Օժանդակություն հաշմանդամներին Ղարաբաղում» ծրագրի 5-րդ փուլը, որի շրջանակներում բժշկական օգնություն են ստացել Արցախյան պատերազմի 100 հաշմանդամ վետերաններ: [15, էջ 121-122]

«Զինիշյան» հիշատակի հիմնադրամի գործունեությունը առողջապահության ոլորտում ուղղված է նաև հիվանդությունների կանխարգելմանն ու առողջ ապրելակերպի խթանմանը: 2013 թվականին հիմնադրամը Երևանում, Լոռիի, Շիրակի, Սյունիքի մարզերում և Ղարաբաղում իրականացրել է «Հաշմանդամության կանխարգելում երեխաների մոտ և արտագնա կյանքականեր» ծրագիրը, որի նպատակն էր նվազեցնել կոնքագրային հողի հաշմանդամությունը երեխաների մոտ և բարեկալվել հաշմանդամ երեխաների կենսական պայմանները: Նույն թվականին ԶՀՀ-ն իրականացրել է նաև «Ամառային ճամբար - 2013 «ծրագիրը, որին մասնակցել են 10-17 տարեկան 156 երեխա Լոռիի, Գեղարքունիքի մարզերից, Երևանից և Ղարաբաղից:[16, էջ 146-147] Ծրագրին մասնակից երեխաները հիմնականում անպահով ընտանիքներից և մանկատներից են:

«Հովարդ Կարագյոյան» հաստատությունը (ՀԿՀ, անգլերեն՝ Howard Karagoyan Medical Benevolent Foundation, կոչվում է նաև «Հովարդ Կարագյոյան հիշատակի ընկերակցություն») բարեփրական կազմակերպություն է: Այն 1921թ.-ին Նյու Յորքում հիմնել են Միհրան և Զապել Կարագյոյանները՝ ի հիշատակ իրենց վաղամենիկ որդու՝ Հովարդի և կոչել նրա անունով: Սկզբնապես հաստատության նպատակն է եղել տարբեր երկրներում ապրող հայ որդ, կարիքավոր մանուկների խնամքի, բուժման և կրթության կազմակերպումը: [17, էջ 18]

1992 թվականի հոկտեմբերին հիմնադրվել և պաշտոնական գրանցում է ստացել Հայաստանի «Հովարդ Կարագյոյան» բարեգործական հասարակական կազմակերպությունը, որի տնօրեն է նշանակվել բժիշկ Կամո Տեր-Պետրոսյանը: Կազմակերպության ծրագրով նախատեսվում էր Երևանում և Հայաստանի տարբեր մարզերում հիմնել միջազգային չափանիշներին համապատասխանող ժամանակակից սարքավորումներով հագեցած և բարձրորակ մասնագետներով համալրված մանկական ատամնաբուժարաններ՝ հայաստանաբնակ երեխաներին անվճար և որակյալ բուժական օգնություն ցուցաբերելու նպատակով:[18, էջ 17-18]

1993 թվականի ապրիլին Երևանի Նորքի բարձրունքում բացվեց Հայաստանի «Հովարդ Կարագյոյան» կազմակերպության առաջին մանկական ատամնաբուժարանը, որն ընդլայնվելով դարձավ կազմակերպության հայաստանյան կենտրոնը և հետագայում գլխավորեց նաև մասնաճյուղ ատամնաբուժարանների աշխատանքը: Կարճ ժամանակամիջոցում բացվել են Գյումրիի (1995 թ.), Գորիսի և Ստեփանակերտի (1996թ.), Երևանի «Սեբաստիա» (1998 թ.) և Վանաձորի (2000 թ.) Կարագյոյան մանկական ատամնաբուժարանները: [19, էջ 143]

ԼՂՀ կառավարության անունից առողջապահության նախարարության և ԱՄՆ Կարագյոյան հաստատության միջև կնքված պայմանագրի համաձայն՝ պայմանավորվածություն ձեռք բերվեց հանրապետությունում բարեգործական հիմունքներով մանկական ատամնաբուժական կենտրոնների ստեղծման և նրա գործունեության ապահովման մասին: 1996 թվականի գարնանը Ստեփանակերտում հանրապետական ախտորոշման կենտրոնի շենքի առաջին հարկում բացվեց Հայաստանի Կարագյոյան հաստատության մանկական ատամնաբուժարանը, որի կահավորման և հատուկ սարքավորումների ծախսերն իր վրա վերցրեց կազմակերպությունը: Մանկական ատամնաբուժական կենտրոնն Արցախում առաջին բարեգործական բժշկական հիմնարկությունն է, որտեղ սպասարկումն անվճար է և նախատեսված միայն ու միայն երեխաների համար:[20]

2003թ Կարագյոյան հաստատության կողմից գնվել է նոր շենք, որը գտնվում է Ստեփանակերտի մանկական հիվանդանոցի և պոլիկլինիկայի հարևանությամբ: Այն կահավորված է, հագեցած է ժամանակակից սարքավորումներով, գործիքներով և բուժանյութերով, ունի 2 ատամնաբուժական, մեկ ակնաբուժական (2003թ.), ախտահանման, մեկ պանորամիկ ռենտգեն կարինետ՝ երևակման սենյակով և գրանցման բաժին: «Հովարդ Կարագյոյան» բարեգործական

հասարակական կազմակերպության Ստեփանակերտի մասնաճյուղ դարմանատան ատամարուժական և ակնաբուժական անվճար որակյալ ծառայություններից օգտվում են Ստեփանակերտ քաղաքի մինչև 14 տարեկան բոլոր երեխաները, ինչպես նաև մերձակա այլ բնակավայրերի հաշմանդամ, երկողմանի կամ միակողմանի ծնողազուրկ, սոցիալապես անապահով մինչև 14 տարեկան երեխաները:

Կազմակերպության ֆինանսավորմամբ իրականացվել է Ստեփանակերտի ներարկման կլինիկայի շինվերակառուցման աշխատանքը:[21] Նրա կողմից կատարվել են ԼՂՀ առողջապահության նախարարության հաշմանդամների վերականգնողական կենտրոնի շենքի կցակառույցի նախագծա-նախահաշվային փաստաթղթերի կազմման [22], ինչպես նաև վերականգնողական կենտրոնի վերակառուցման աշխատանքներ:[23]

«Հովարդ Կարագյողյան» բարեգործական հասարակական կազմակերպությունը բացի ատամարուժական և ակնաբուժական անվճար ծառայություններից իրականացնում է «Վատ լսող երեխաներին լսողական ապարատների անվճար բաշխում» (իրականացվում է 2002 թվականից), «Պարբերական հիվանդությամբ երեխաների դեղորայքի անվճար բաշխում» (իրականացվում է 2003 թվականից), «Մրտի բնածին արատներով մինչև 7 տարեկան երեխաների անվճար վիրահատություններ» (իրականացվում է 2003 թվականից), «Էպիլեպսիայով հիվանդ երեխաներին դեղորայքի անվճար բաշխում» (իրականացվում է 2004 թվականից) ծրագրերը, որոնցից օգտվել են տասնյակ հազարվոր հայ երեխաներ Երևանից, ՀՀ տարրեր մարզերից և ԼՂՀ-ից:

«Հովարդ Կարագյողյան ընկերակցության» կողմից Արցախում իրականացվող վերոհիշյալ ծրագրերը կրում են շարունակական բնույթ՝ նպաստելով հայ երեխաների առողջության պահպանմանը:

Հիմնադրամի նախաձեռնությամբ 2014թ. իրականացվել է «Ղարաբաղի հիվանդանոցներում վերականգնողական կենտրոնների ստեղծում» ծրագիրը, որի նպատակն է բարելավել վերականգնողական ծառայությունները ԼՂՀ Ստեփանակերտի, Հադրութի, Մարտակերտի, Մարտունու հիվանդանոցներում և Ստեփանակերտի վերականգնողական կենտրոնում:[24, էջ 124]

Արցախի Հանրապետությունում առողջապահական ծրագրերի իրականացման գործում մեծ ներդրում ունեն սփյուռքահայ բարերարները: Նրանց աջակցությամբ շահագործման են հանձնվել տասնյակ բուժկետեր տարրեր շրջաններում, վերանորոգվել հիվանդանոցներ, կազմակերպվել բուժաշխատողների վերապատրաստում և այլն:

ԼՂՀ Մարտակերտի շրջանի Նոր Կարմիրավան գյուղի բուժկետ-գյուղապետարանի վարչական շենքի կառուցումն իրականացվել է Իրանի Իսլամական Հանրապետության քաղաքացի, բարերար Օնիկ Հարությունյանի ֆինանսավորմամբ:[25] Ամերիկահայ բարերար Զեյմս Թուֆենլյանի ֆինանսական աջակցությամբ կառուցվել է Քաշաթաղի շրջանի Իշխանաձոր գյուղի բժշկական համալիրը:[26] Այն սպասարկում է 20 գյուղերի բնակչիների և շարունակում է իր գործունեությունը «Թուֆենլյան» բարեգործական հիմնադրամի և ԼՂՀ առողջապահության նախարարության աջակցությամբ:[27, էջ 124]

Ամերիկահայ բարերար Վաշե Հովսեփյանի, Կալիֆորնիայի հայ ատամարուժների միության և հատկապես բարերար Վիգեն Կարապետյանի հովանավորությամբ Մարտունու շրջանի Աշան գյուղում 2003 թվականին բացվեց ատամարուժական կլինիկա համալրված բոլոր անհրաժեշտ սարքավորումներով: Կլինիկայում դպրոցականները ստանում են անվճար բուժօգնություն: Սակայն, լինելով միակը շրջանի համայնքներում, բացի դպրոցականներից, ատամարուժարանի ծառայություններից օգտվում են նաև հարևան գյուղերի բնակչիները:[28]

Ռուսաստանի Դաշնության Կրասնոդար քաղաքում ապրող բարերարներ Համետ Համբարձումյանի և Վոլոյյա Ավագյանի բարեգործությամբ վերանորոգվեց Մարտունու շրջանի Ճարտար գյուղի տեղամասային հիվանդանոցը:[29]

2013 թվականի սեպտեմբերի 24-ին Ստեփանակերտում շահագործման հանձնվեց ԼՂՀ առողջապահության նախարարության նորակառույց ժամանակակից պայմաններին համապատասխան Հանրապետական բժշկական կենտրոնը: Այն կառուցվել է Մոսկվայում գործող «Տաշիր» ընկերությունների խմբի նախագահ, մեծ բարերար Սամվել Կարապետյանի ֆինանսական աջակցությամբ: Կենտրոնը հագեցած է նոր սերնդի առաջնակարգ բուժսարքավորումներով: Այն նախատեսված է 136 մահակալի համար, այդ թվում 60-ը՝ թերապևտիկ բաժնամունքում: Առկա է պլանային հիվանդների ընդունարան, շտապ և անհետաձգելի բժշկական օգնության բաժնամունք՝ իր

բարձրակարգ բժշկական սարքավորումներով հագեցած երկու ռեանիմոբիլներով, վիրահատական բլոկ, հեմոդիալիզի բաժանմունք, վարչատնտեսական մաս և շենքից դուրս տեղակայված տնտեսական մաս:[30] ԼՇՀ նախագահի առաջարկությամբ հիվանդանոցը կրում է բարերարի ծնողների<sup>a</sup> Սարգիս և Ամալյա Կարապետյանների անունը: 2016թ. աշնանը Սամվել Կարապետյանի նվիրատվությամբ հանրապետական բժշկական կենտրոնին հարող տարածքում բացվեց ճարտապետական ուշագրավ լուծումներով պուրակ:

Հայկական բարեգործական ընդհանուր միության (ՀԲԸ) անդամ և բարերար Նազար Նազարյանի նվիրատվությամբ Արցախի Հանրապետության բժշկական կենտրոնին տրամադրվել է Toshiba մակնիշի գերձայնային սարք, որը հնարավորություն կտա իրականացնելու սրտանոթային, վահանաձև գեղձի, որովայնի և այլ հետազոտություններ: [31, էջ 127]

Մոսկվաբնակ հայ բարերար, «Լուդինգ» ընկերության հիմնադիր-նախագահ Արթուր Վարժապետյանի կողմից Արցախի առողջապահության նախարարությանը տրամադրվեց երկու ռեանիմոբիլ և շտապ օգնության չորս գծային ավտոմեքենաներ, [32] իսկ կանադահայ բարերար Ավետիս Պողոսյանի կողմից օգտագործման գինեկոլոգիական միանգամյա հայելիներ: [33]

Արցախի Հանրապետության առողջապահության նախարարության հանրապետական բժշկական կենտրոնի հետ սերտ կապեր է հաստատել ֆրանսիական «Հայ-մեդ» ասոցիացիան: Նախարարության հրավերով 2017թ. մարտին կազմակերպության օրթոպեդ Մկրտիչ Կարապետյանը հերթական անգամ բժշկական կենտրոնում իրականացրեց անվճար ընդունելություններ, խորհրդատվություններ վիրահատություններ: 2012 թվականից ի վեր Մ. Կարապետյանը ամեն տարի այցելում է Արցախ և իր գործընկերներին ներկայացնում վնասվածքաբանության վերջին մուտքումները, բուժման արդի եղանակները, նվիրաբերում բժշկական պարագաներ: Ամեն անգամ հետազոտվում և բուժօգնություն է ստանում ավելի քան 60 հիվանդ: Անվճար իրականացված վիրահատություններից բացի՝ ֆրանսահայ վնասվածքաբանը հիվանդանոցին նվիրաբերել է մի քանի պրոթեզ: [34]

«Հայ-մեդ» մարդասիրական ասոցիացիայի նախաձեռնությամբ 2017թ. ապրիլին կազմակերպվեց «Բաց դրսերի օր»: Ասոցիացիայի նախագահ անեսթեզիոլոգ-ռեանիմատոլոգ Ժան Միշել Էրքերյանը, ուրող Շանթ Բայյանը, բուժքույր Վալերի Սայադյանը Ստեփանակերտում և հանրապետության տարբեր շրջաններում անվճար իրականացրին հիվանդների ընդունելություններ, խորհրդատվություններ, վիրահատություններ, առողջապահության համակարգի բուժաշխատողներին ներկայացրին ուրողիայի և անեստեզիոլոգիայի ոլորտների նորագոյն մեթոդները, բուժօգնության եվրոպական չափանիշները: Այդ ամենին զուգահեռ նրանք, լինելով Արցախի առանձին գյուղերում, ծանոթացել են բուժկետերի աշխատանքներին, տրամադրել նրանց անհրաժեշտ դեղորայք, բժշկական պարագաներ: Կազմակերպությունը իրականացնում է նաև համայնքային բուժկետերի վերանորոգման աշխատանքներ: [35]

ԱՄՆ Կալիֆորնիա նահանգի Ֆրենզո քաղաքի հայ համայնքի օժանդակությամբ հանրապետական բժշկական կենտրոնի պոլիկլինիկական բաժանմունքում, Սոր և մանկան առողջության պահպանման կենտրոնում, «Արսիկ» մանկական բուժմիավորումում և «Դենտեք Դենտալ գրուպ» ատամնաբուժական կլինիկայում ամերիկացի բժիշկների կողմից կազմակերպվեց «Բաց դրսերի օր»: Ծրագրի շրջանակներում շուրջ 30 բժիշկներ թերապևտներ, ընդհանուր և դիմանոտային վիրաբույժներ, նեռնատողներ ու մանկաբարձ-գինեկոլոգներ, մանկաբույժներ, ատամնաբույժներ անցկացրին անվճար խորհրդատվություններ ու հետազոտություններ, կատարեցին վիրահատություններ (հատկապես գինվորների շրջանում: Նրանք բերել էին անհրաժեշտ դեղորայք, սարքավորումներ: Հատկապես կարևոր նշանակություն ուներ ակնահատակի հետազոտման «Շետինոսկոպ» սարքը, որը գործածվում է հատկապես շաքարային դիաբետով տառապող և հիվանդության պատճառով կուրանալու վտանգ ունեցող հիվանդների շրջանում: [36]

Շուշիի հիվանդանոցի հետ սերտ կապեր է հաստատել հայտնի սիրիահայ վիրաբույժ ACMA (Հայկական քրիստոնեական բժշկական ասոցիացիա) կազմակերպության նախագահ Զահիդ Հադիդաբեր (Հովհաննես Դեմիրճյան): Նրա դեկավարությամբ կազմակերպության անդամները մարդասիրական առաքելությամբ չորս անգամ այցելել են Շուշի: Շորքորդ այցելության ժամանակ, Շուշիի հիվանդանոցի գլխավոր բժիշկ Վիկեն Խաչատրյանի հետ միասին կատարվել են 80 հետազոտություններ, ինչպես նաև 30 վիրահատություններ՝ զոր, լեղապարկ, թութք և Ճողվածքներ

(գրիժաներ): [37] 2017թ. հունիսին «Բաց դռների օր» ծրագրի շրջանակներում նրա կողմից կատարվել են շուրջ 100 խորհրդատվություն, 46 վիրահատություն, 41 վիրահատություն Շուշիում, 5-ը՝ Մարտակերտում: [38]

Արցախի Հանրապետության առողջապահության նախարարության հրավերով 2016թ. դեկտեմբերին Ստեփանակերտում էին ավատրիահայ անոթաբան Արա Ուղուրյանի զիմավորությամբ անոթային երեք վիրաբույժներ, որոնք հանրապետական բժշկական կենտրոնում անվճար հետազոտեցին 50 հիվանդի, իսկ 15-ին վիրահատեցին անոթաբանության ոլորտի արդի մեթոդներով: [39] 2017թ. երկօրյա այցի ընթացքում Ա. Ուղուրյանը հասցրել է հետազոտել 20 հաճախորդի, իսկ 13-ին վիրահատել տեղի մասնագետների հետ համատեղ: [40]

2017թ. հունիսին առողջապահության նախարարության Մոր և մանկան առողջության պահպանման կենտրոնում անվճար խորհրդատվություններ, 40 հետազոտություններ, լապորտսկոպիկ և նեղ գինեկոլոգիական 16 վիրահատություններ կատարեց ծննդով արցախցի, ներկայումս Սոսկվայի Վայինսկու հիվանդանոցի գինեկոլոգիական բաժնի վարիչ Կոնստանտին Տնիկյանը:[41] Նման այցելությունները և աջակցությունը նպաստում են առողջապահության ոլորտի մասնագետների որակավորման բարձրացմանը:

Ներկայումս վերոնշյալ հիմնադրամները, անհատ բարերարները շարունակում են իրենց ազգանվեր բարեգործական գործունեությունը: Շնորհիվ այդ օգնության լուրջ հաջողություններ են ձեռք բերվել Արցախի Հանրապետության առողջապահության ոլորտում: Այս ամենը Հայաստան-Արցախ-Սփյուռք համագործակցության փայլուն օրինակ է:

## ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

1. Հայկական համառոտ հանրագիտարան, Եր., 1999, հ.3, էջ 105;
2. Արահամյան Հ., Վարդանյան Ա., «Հայաստան» հիմնադրամի ներդրումը ԼՂՀ զարգացման գործում, Մերոպ Մաշտոց Համալսարանի «Լրատու», 2012, հմ.1(12):
3. «Ազատ Արցախ», 22 նոյեմբերի 2012:
4. ԼՂՀ պետական արխիվ, ֆ.180, գ.1, կ-17, պ.մ.95, թ.4:
5. Մինասյան Է., Վարդանյան Ա., Հայրենիք-Սփյուռք առնչությունները ՀՀ անկախության տարիներին (1991-2009թթ.), Ստեփ., 2010:
6. «Հայաստան» համահայկական հիմնադրամ 2013, տարեկան հաշվետվություն, Եր., 2014:
7. «Ազատ Արցախ», 4 ապրիլի 2017:
8. Սփյուռքահայ կազմակերպություններ, Եր., 2002:
9. «Ազատ Արցախ», 8 դեկտեմբերի 2015:
10. «Ազատ Արցախ», 16 հունիսի 2016:
11. «Ազատ Արցախ», 3 սեպտեմբերի 2016:
12. Հայաստանյայց Ավետարանական եկեղեցի, 2003, թ2 (26):
13. «Հայ Սփյուռք» հանրագիտարան, Եր., 2003:
14. Հայկական Սփյուռք: Տարեգիրը 2010, Եր., 2011, էջ 136-137:
15. Նոյն տեղում, 2012, Եր., 2012:
16. Նոյն տեղում, Տարեգիրը 2013, Եր., 2014:
17. The Howard Karagheusian Commemorative Corporation. 75 years of service, New York 1996:
18. Հովարդ Կարագյուղյան հիշատակի ընկերակցությունը Հայաստանում (10 տարի), Եր., 2002:
19. Հայկական Սփյուռք: Տարեգիրը, Եր., 2009:
20. «ԼՂ Հանրապետություն», 28 մայիսի 1996:
21. ԼՂՀ պետարխիվ, ֆ. 180, գ.1, կ.10, պ.մ.45, թ.69:
22. Նոյն տեղում, ֆ. 180, գ.1, կ.11, պ.մ.50, թ.33:
23. Նոյն տեղում, ֆ. 180, գ.1, կ.11, պ.մ.50, թ.14:
24. Հայկական Սփյուռք: Տարեգիրը 2014, Եր., 2015:
25. ԼՂՀ պետարխիվ, ֆ. 180, գ.1, կ.11, պ.մ.50, թ.85:
26. ԼՂՀ պետարխիվ, ֆ. 180, գ.1, կ.11, պ.մ.50, թ.71:
27. Հայկական Սփյուռք: Տարեգիրը, 2010, Եր., 2011:
28. «Ազատ Արցախ», 8 սեպտեմբերի 2011:

29. «Ազատ Արցախ», 3 հուլիսի 2014:
30. «Ազատ Արցախ», 26 սեպտեմբերի 2013:
31. Հայկական Սփյուռք: Տարեգիրը 2013, Եր., 2014:
32. «Ազատ Արցախ», 26 սեպտեմբերի 2013:
33. «Ազատ Արցախ», 15 ապրիլի 2017:
34. «Ազատ Արցախ», 26 սեպտեմբերի 2013:
35. «Ազատ Արցախ», 15 ապրիլի 2017:
36. «Ազատ Արցախ», 13 հոկտեմբերի 2016:
37. «Ազատ Արցախ», 22 նոյեմբերի 2012:
38. «Ազատ Արցախ», 22 նոյեմբերի 2017:
39. «Ազատ Արցախ», 10 դեկտեմբերի 2016:
40. «Ազատ Արցախ», 15 օգոստոսի 2017:
41. «Ազատ Արցախ», 27 հունիսի 2017:

## РЕЗЮМЕ

**Вклад благотворительных фондов и частных бенефициаров в реализацию программ по здравоохранению в Республике Арцах**  
**Аарат Варданян, Белла Бабаян**

**Ключевые слова:** Республика Арцах, Всеармянский фонд «Айастан», Объединенный армянский фонд, Фонд «Армения-Арцах», Фонд «Мемориал», Фонд Говарда Карагёзяна, инвестиции, благотворители, благотворительность, программы здравоохранения.

Неоценима помощь фондов и частных бенефициаров спорка в деле решения вопросов сферы здравоохранения Республики Арцах. Под их патронажем и при финансовом участии правительства Республики Арцах были открыты десятки медпунктов, больниц, приобретены лекарственные препараты, современное медицинское оборудование, осуществлена переподготовка медперсонала. Благодаря помощи таких патриотов в сфере здравоохранения были достигнуты серьезные успехи.

## SUMMARY

**Contribution of Charity Funds and Private Beneficiaries in the Implementation of Health Programmes in the Republic of Artsakh**  
**Ararat Vardanyan, Bella Babayan**

**Key words:** The Republic of Artsakh, Hayastan All-Armenian Fund, United Armenian Fund, "Armenia-Artsakh" Foundation, "Memorial" Foundation, Howard Karagozyan Foundation, investments, philanthropists, charity, health programs.

Invaluable is the assistance of charity funds and private beneficiaries of the Diaspora in addressing the issues of healthcare of the Republic of Artsakh. Under their patronage and with the financial participation of the government of the Republic of Artsakh dozens of clinics, hospitals were opened, medicines, modern medical equipment were purchased and retraining of medical personnel was carried out. Thanks to the help of such patriots major successes were achieved in the health sector.